

Chançon ferai, que talent m'en est pris

- letto 136 volte

Edizioni

- letto 102 volte

Wallensköld

I.

Chanson ferai, que talenz m'en est pris,
de la meilleur qui soit en tout le mont.
De la meilleur? Je cuit que j'ai mespris.
S'ele fust teus, se Deus joie me dont,
de moi li fust aucune pitié prise,
qui sui touz siens et sui a sa devise.
pitié de cuer, Deus! Que ne s'est assise
en sa biauté? Dame, qui merci proi,
*je sent les maus d'amer por vos,
sentez les vos por moi?*

II.

Douce dame, sanz amor fui jadis,
quant je choisi vostre gente façon;
et quant je vi vostre tres biau cler vis,
si me raprist mes cuers autre reson:
de vos amer me semont et justise,
a vos en est a vostre comandise.
li cors remaint, qui sera felon juïse,
se n'en avez merci de vostre gré.
*Li douz mal dont j'atent joie
m'ont si grevé morz sui, s'ele m'i delaie.*

III.

Mult a Amors grant force et grant pouoir,
qui sanz reson fet choisir a son gré.
Sanz reson? Deus! Je ne di pas savoir,
car a mes euz en set mes cuers bon gré,
qui choisirent si tres bele senblance,

dont jamès jor ne ferai desevrance,
ainz sousfrirai por li grief penitance,
tant que pitiez et merciz l'en prendra.
Diré vos qui mon cuer enblé m'a?
li douz ris et li bel oeil qu'ele a.

IV.

Douce dame, s'il vos plesoit un soir,
m'avriéz vos plus de joie doné
c'onques Tristans, qui en fist son pouoir,
n'en pout avoir nul jor de son aé;
la moie joie est tornee a pesance.
Hé, cors sanz cuer! De vos fet grant venjance
cele qui m'a navré sanz defiance,
et ne por quant je ne la lerai ja.
L'en doit bien bele dame amer
et s'amor garder, qui l'a.

V.

Dame, por vos vueil aler foloiant,
que je en aim mes maus et ma dolor,
qu'après les maus la grant joie en atent
que je avrai, se Deu plest, a brief jor.
Amors, merci! ne soiez oublïee!
S'or me failliez, c'iert traïson doublee,
que mes granz maus por vos si fort m'agree.
ne me metez longuement en oubli!
Se la bele n'a de moi merci,
je ne vivrai mie longuement ensi.

VI.

La grant biautez qui m'esprent et agree,
qui seur toutes est la plus desirree,
m'a si lacié mon cuer en sa prison.
Deus! Je ne pens s'a li non.
a moi que ne pense ele donc?

- letto 86 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/chan%C3%A7on-ferai-que-talent-men-est-pris>